

KERAJAAN SERI PADUKA BAGINDA
MALAYSIA

PEKELILING PERKHIDMATAN BIL. 2 TAHUN 1987

**KEBENARAN KEPADA PEGAWAI AWAM BAGI MENUBUHKAN
SYARIKAT PEGANGAN KELUARGA (FAMILY HOLDING COMPANY)**

1. Tujuan

1.1 Pekeliling Perkhidmatan ini bertujuan untuk menyampaikan keputusan Kerajaan mengenai syarat-syarat memberi kebenaran kepada pegawai awam menubuhkan Syarikat Pegangan Keluarga (Family Holdings Company).

2. Pendahuluan

2.1 Kerajaan telah bersetuju membenarkan pegawai awam menubuhkan Syarikat Pegangan Keluarga dan menjadi Ahli Lembaga Pengarah Syarikat yang berkenaan. Penubuhan Syarikat Pegangan Keluarga oleh pegawai awam adalah dibenarkan dalam keadaan-keadaan berikut:

- (a) untuk memelihara kepentingan harta pegawai dan ahli-ahli keluarganya khususnya untuk mengelakkan masalah-masalah yang berbangkit dari soal warisan apabila seseorang itu meninggal dunia; dan
- (b) untuk memberi peluang kepada seseorang pegawai awam itu membuat persediaan yang wajar baginya untuk menjalankan kegiatan aktif dalam syarikat selepas bersara dari perkhidmatan awam.

3. Syarat-syarat

3.1 Pegawai awam dibenarkan menubuh Syarikat Pegangan Keluarga bertujuan untuk mentadbirkan harta yang dimiliki oleh mereka, termasuk harta yang dimiliki oleh suami atau isteri dan anak yang di bawah tanggungannya yang mana pemilikan

harta itu telahpun dilaporkan kepada Pihakberkuasa Tatatertib, tertakluk kepada syarat-syarat seperti berikut:

- (a) sebelum syarikat ditubuhkan, pegawai yang berkenaan hendaklah mendapatkan kebenaran daripada Pihakberkuasa Tatatertib terlebih dahulu;
- (b) pegawai berkenaan tidak dibenar melibatkan diri secara langsung di dalam pengurusan harian Syarikat Pegangan Keluarga dengan menjadi salah seorang eksekutif syarikat itu;
- (c) sekiranya seseorang pegawai itu menjadi Ahli Lembaga Pengarah Syarikat yang berkenaan, penglibatannya tidak boleh dilakukan dalam waktu pejabat;
- (d) penglibatan pegawai dalam syarikat itu tidak akan menimbulkan pertelingkahan antara kepentingan rasmi dan persendirian pada bila-bila masa sekalipun;
- (e) pegawai berkenaan hendaklah memperbaharui kebenaran daripada Pihakberkuasa Tatatertib yang berkenaan tiap-tiap 3 tahun sekali;
- (f) pegawai berkenaan hendaklah mengemukakan kepada Pihakberkuasa Tatatertib "Memorandum and Articles of Association" yang menunjukkan had kegiatan syarikat dan ahli-ahli syarikat;
- (g) pegawai awam yang mewarisi harta dalam Syarikat Pegangan Keluarga boleh dibenar mengekalkan harta miliknya dalam syarikat tersebut, tertakluk kepada syarat-syarat yang sama seperti di perenggan (a) hingga (f). Walau bagaimanapun, jika Syarikat Pegangan Keluarganya menjalankan kegiatan perniagaan selain dari untuk mentadbirkan harta yang dimiliki oleh pegawai, maka pegawai yang berkenaan hendaklah meletakkan jawatannya dalam Lembaga Pengarah Syarikat itu. Pegawai itu boleh melantik "nominee" untuk menjaga kepentingannya dalam syarikat tersebut jika perlu; dan
- (h) Syarikat Pegangan Keluarga tidak dibenar menubuhkan syarikat-syarikat milikan atau syarikat-syarikat sekutu.


4. Permohonan

4.1 Pegawai hendaklah membuat permohonan kepada Pihakberkuasa Tatatertib Yang Berkenaan dan selepas meneliti permohonan itu Pihakberkuasa Tatatertib Yang Berkenaan berkuasa membuat keputusan sama ada meluluskan atau menolak permohonan itu.

5. Tarikh Kuatkuasa

5.1 Pekeliling Perkhidmatan ini adalah berkuatkuasa mulai daripada tarikh ia dikeluarkan.

“BERKHIDMAT UNTUK NEGARA”



(Tan Sri Dato' Alwi Jantan)
*Ketua Pengarah Perkhidmatan Awam,
Jabatan Perkhidmatan Awam Malaysia*

Tarikh: 27 Mei, 1987.

Semua Ketua Setiausaha Kementerian.
Semua Ketua Jabatan-Ketua Jabatan Persekutuan.
Semua Y.B. Setiausaha Kerajaan Negeri.

s.k.:

Semua Pihak Pengurusan Badan-badan Berkanun Persekutuan dan Negeri.
Semua Pihak Pengurusan Kuasa-kuasa Tempatan.